

Mid-Day Dogri News Bulletin, 21st June 2025

समे – 12:25

<><><><><><>

PM Yoga

समूलची दुनिया च अज्ज पूरे जोश ते एकता दी भावना कन्नै योग सरबंधी 11मां अंतराष्ट्री ध्याड़ा मनाया जा'रदा ऐ। आलमी सतह दिएं महत्वपूर्ण थाहरें थमां लेइयै मुकामी पार्के तोहड़ी अज्ज सब्भनें थाहरें पर लोक योग मुद्राएं दा अभ्यास करै करदे न। इस ब'रे अंतराष्ट्री योग दिवस दा विशे सार ऐ – इक धरती, इक सेहत लेई योग। प्रधानमंत्री नरेन्द्र मोदी होरें अज्ज अंतराष्ट्री योग दिवस मनाने च समूलचे मुख्य दी अगुवाई कीती। मोदी होरें आंध्र प्रदेश दे विशाखापत्तनम च ढाई लख शा मते योग प्रेमिणं दे कन्नै योग दे बक्ख-बक्ख आसन कीते। इस कार्यक्रम दा आयोजन विशाखापत्तनम दे आर.के. बीच थमां लेइयै भोगापुरम तगर दे 26 किलोमीटर लम्मे हिस्से च कीता गेआ।

<><><><><><>

JK Yoga

देश-दुनिया दे बक्ख-बक्ख हिस्सें आह्ला लेखा जम्मू संभाग च बी 11मां अंतराष्ट्री योग ध्याड़ा अज्ज पूरे जोश ते एकता दी भावना कन्नै मनाया जा'रदा ऐ। सार्वजनिक पार्के थमां लेइयै सरकारी दफतरें तगर च लोकें खरी मती गिनतरी च किट्ठे होइयै योग अभ्यास कीता ते शारीरिक ते मानसिक तंदरुस्ती दा स्नेहा पूरी दुनिया तोहड़ी पुजाऽ करदे न। तोआई रक्षा मंत्री राजनाथ सिंह होरें अज्ज उधमपुर च फौज दी उत्तरी कमान दे सदर मुकाम च थेहारबंद बलें दे जवानें कन्नै योग कीता। केन्द्री मंत्री डाक्टर जीतेन्द्र सिंह होरें बी उधमपुर च गै रामनगर आहले इन्डोर स्टेडियम च आयोजित योग कार्यक्रमै दी अगुवाई कीती। उधमपुर दिएं डिप्टी कमिशनर सलोनी राय, डीडीसी अध्यक्ष, मुकामी विधायक ते सरबंधत अधिकारिणं बी इस कार्यक्रमै च हिस्सा लैता। तोआई कैबिनेट मंत्री सतीश शर्मा होरें बी अज्ज जम्मू दे गुलशन ग्राउंड च आयोजित योग कार्यक्रम दी अगुवाई कीती।

<><><><><><>

Yoga RNU

अंतर्राष्ट्रीय योग ध्याडे दे मौके पर आकाशवाणी दे क्षेत्रीय समाचार एकांश जम्मू दे कर्मचारिएं बी एकांश दे अध्यक्ष एन. गुलशन रैणा हुंदे दिशा निर्देशें मूजब योग अभ्यास कीता। कार्यक्रम च वर्चुअल ढंगे नै शिरकत करदे होई गुलशन रैणा होरें इस मौके योगासन करा'रदे कर्मचारिएं दी सराहना कीती ते आह्वान कीता जे सब्बनें गी योग गी अपना रोजमर्रा दे जीवन दा अनुनुट्ट हिस्सा बनाइयै शारीरिक, मानसिक ते आध्यत्मिक तौरा पर इक नरोआ जीन जीना लोड़चदा।

<><><><><><>

JK Students

जम्मू कश्मीर सरकार ईरान थमां सुरक्षत भारत आंदे गेदे लोकें ते विद्यार्थिएं गी सुरक्षत उंदे घरे तगर पजाने लेई निगगर बंदोबस्त कीते दे न ते ट्रांसपोर्ट मंत्री सतीश शर्मा होरें एह्दे लेई कीती गेदी बवस्थाएं दी आपूं निगरानी करै करदे न। जे.के.आर.टी.सी दियां बसां दिलली ब्हाई अड्डे थमां विद्यार्थिएं गी उंदे शैहरें नगरे तगर पजाने लेई लाइयां गेदियां न। जिंदी अगुवानी ट्रांसपोर्ट मैह्कमे दे अधिकारी करै करदे न। मंत्री समीश शर्मा होरें जम्मू कश्मीर दे सुरक्षत बचाइयै आंदे गेदे सब्बने लोकें गी पूरी चाल्ली रमानदारी कन्नै उंदे घरें पजाने दी सरकार दी वचनबद्धता गी पक्का कीता ऐ।

<><><><><><>

Dt CM-PWD

उपमुख्यमंत्री सुरिन्दर चौधरी होरें जंदे रोज लोक निर्माण मैह्कमे दी इक व्यापक जायजा बैठक दी अध्यक्षता कीती। जेह्दे च नाबार्ड, पीएमजीएसवाई, सीआरआईएस ते पुले दे निर्माण सरबंधत योजनाएं दे तैहत जम्मू संभाग च विकास परियोजनाएं दी प्रगति पर ध्यान केन्द्रित कीता गेआ। बैठक च सरबंधत अधिकारिएं इनें जरूरी कम्में गी सबूरा करने दरान दरपेश चुनौतिएं गी उजागर करदे होई परियोजनाएं दी ताजा जानकारी सांझा कीती। इक विस्तृत समीक्षा दे परैंत उपमुख्यमंत्री नै अधिकारिएं गी निर्देश दित्ते जे ओह सब्बने कम्में दी प्रगति च तेजी आहन्नन तां जे सारे निर्धारत गुणवत्ता मानकें गी बनाई रखदे होई इनें कम्में गी समें सिर सबूरा करना जकीनी बनाया जाई सकै।

<><><><><><>

CS – Mubarak Mandi

मुख्य सचिव अटल डुल्लू होरें मुबारक मंडी हैरिटेज सोसायटी, जम्मू दी 29मीं कार्यकारिणी मंडल दी बैठक दी अगुवाई कीती। बैठक च डुल्लू होरें ऐतिहासक मुबारक मंडी परिसर च बुनियादी ढांचे दे सुधार दी योजना दी समीक्षा कीती। सांस्कृतिक जीवंतता ते सैलसफा दी समर्थ दे महत्त्व पर लोह पांदे होई मुख्य सचिव होरें संरक्षण दे जतनें च तेजी आहनने ते ब्हाल कीती गेदिएं इमारतें गी अजेबघरें, शैक्षणिक केन्द्रें ते कैफे च परतियै तैआर करने दे निर्देश दित्ते। प्रस्तावत परियोजनाएं च बहु-स्तरी पार्किंग सर्कुलर रोड गी जोड़ने आला इक नमां पुल, पीरखो थमां इक लंबत लिफ्ट ते सार्वजनिक निजी भागीदारी मॉडल दे तैहत किश प्रोजेक्ट शामिल न। मुख्य सचिव होरें मुबारक मंडी परिसर गी जम्मू च इक प्रमुख सांस्कृतिक ते सैलसफा आले थाहर दे रूपै च विकसित करने आस्तै नेड़में तालमेल आले जतनें दी जरूरतै पर जोर दित्ता।

<><><><><><><>

Kathua Amarnath Preparations

कठुआ दे डिप्टी कमिशनर डाक्टर राकेश मिन्हास होरें औंदी श्री अमरनाथ जी दी जात्तरा लेई तैयारिएं दा जायजा लैने गितै कल इक बैठक सददी। इस मौके पर उ'नें सरबंघत अधिकारिएं गी निर्देश दित्ता जे ओह बकाया रौंहदे कम्में च तेजी आहन ते जात्तरा शा पैहले सब्भै बंदोबस्त जकीनी बनाई लैन। कठुआ जिले च श्री अमरनाथ श्रद्धालुएं दे रौहने-बौहने लेई 36 केन्द्र स्थापित कीते गेदे न ते हर इक केन्द्र लेई इक समर्पित नोडल अफसर नियुक्त कीता गेदा ऐ। श्रद्धालुएं दी सुविधा लेई लखनपुर च 6 आर.एफ.आई.डी काउंटर खडरे जाडन। डिप्टी कमिशनर होरें पानी, बिजली, साफ-सफाई, ट्रैफिक ते सुरक्षा सरबंधी योजनाएं गी अगेत्रे गै मुक्कदा रूप देने दी जरूरतै पर जोर पाया।

<><><><><><><>

Neeraj Chopra

भारत दे नीरज चोपड़ा होरें पेरिस डायमंड लीग जैवलिन थ्रो प्रतियोगिता जित्ती लैती ऐ। कल रातीं स्टेड सेबेसचियन चार्लेटी च आयोजित प्रतियोगिता च द'उं बारी दे ओलंपिक पदक विजेता नीरज होरें 88 इशारिया इक-6 मीटर दी दूरी पर नेजा सुट्टियै एह खताब जित्ती

लैता। जर्मनी दे जूलियन वेबर 87 इशारिया 8–8 मीटर दे अपने सर्वोत्तम प्रयास दे कन्नै दुई
ते ब्राजील दे लुईज मौरिसियो 86 इशारिया 6–2 मीटर दे कन्नै त्रीऽ थाहरै पर रेह।

<><><><><><>

